


TEZĂUR LITURGIC

25 IUNIE

ACATISTUL SF. CUVIOS DALMAT DE LA ISET



MOSCOVA, 2000



Акафист

святому преподобному

Далмату Исетскому

Кондак 1

Избранный от воинства земного к воинству
Небесному, в землю Исетскую от страны
отечества своего пришедый, идеже Заступницу
рода христианского чудесно обретый, и в ней
обитель во славу Царицу Небесных устроивый,
восхваляем тя, чудотворче святой
небодохновенный; но яко имея дерзновение ко
Господу, от рова погибельного нас изведи, да
зовем ти:

Радуйся, преподобне отче наш Далмате,
Исетский чудотворче.

Икос 1

Ангел-хранитель соблюл еси тя, отче, до возраста
мужескаго, воззва тя в удобное Богу время на
житие превыше мирскаго попечения, к жизни
иноческой евангельской, юже сохранил еси в

чистоте и непорочности, тем освяти вся концы земли нашея, да зовем ти:

Радуйся, во граде Тобольске рожденный; Радуйся, града Божия наперснике вожденный.

Радуйся, воинство земное от отца унаследовавый; Радуйся, воинству Небесному причастниче святой.

Радуйся, родителей своих достойное продолжение; Радуйся, славы святых несомненное умножение.

Радуйся, страны Сибирския подвижниче, доселе неизреченный; Радуйся, в меру возраста Христова скоро пришедый.

Радуйся, семьи христианския, церкви малыя, до времени не оставивый; Радуйся, яко Бог ты на делание сие изведый.

Радуйся, земли Исетския чудесное основание; Радуйся, покрываяй нас сиянием святым.

Радуйся, преподобне отче наш Далмате, Исетский чудотворче.

Кондак 2

Многия скорби и печали жития мирскаго приизлиха приуготовиша душу твою, но яко при источнице вод некое древо псаломское

возрасташе дух твой ко Господу, Ему же измлада прилежа пети песнь: Аллилуия.

Икос 2

Время призвания твоего, отче досточудне, от мира к чину Ангельскому чтим изумевая: како кто от подвижник, седине обретенней, возможе яко елень на источницы водныя устремитися к иному жительству, аще не Господь, исправляющий стопы человеку, да зовем ти:

Радуйся, тайну призвания своего измлада хранивый; Радуйся, Промысла Божия исполнение явивый.

Радуйся, ближния своя премного удививый; Радуйся, по успении супружницы твоея взор к Небу возведый.

Радуйся, света евангельскаго чудесное озарение; Радуйся, имений и чад несметных обречение.

Радуйся, якоже Авраам дом отца своего в стране Халдейстей оставивый; Радуйся, землю обетования, якоже оному Господь тебе даде.

Радуйся, мирское попечение по всяческим отложивый; Радуйся, чающий Бога, якоже Давид.

Радуйся, в молитве неустанно пребывающий;
Радуйся, укрепление душ наших и сердец.

Радуйся, преподобне отче наш Далмате,
Исетский чудотворче.

Кондак 3

Ища утешения духовнаго, прилепился еси к
первей обители твоей, яже во граде Невьянстем,
идеже зря преуспеяние твое необычное,
возведет тя Бог в чин иноческий, да воспоешь
Ему неведомую миру ангельскую песнь:
Аллилуия.

Икос 3

Како подвизался еси в возрасте сый, како иных
превзошед послушанием и смирением,
дарований духовных сподобился еси, да зовем
ти:

Радуйся, отче преподобне; Радуйся,
причастниче святым.

Радуйся, ищущий подвигов духовных;
Радуйся, смиренномудрия иский.

Радуйся, мужу желаний неизреченный;
Радуйся, человеке Божий среди оболкшихся с
тобой.

Радуйся, многия виды послушания
исполнивый; Радуйся, яко к подвигам новым
Господь тебе зовый.

Радуйся, от братии богомудрым нареченный;
Радуйся, многия к себе привлекий.

Радуйся, пищи нетленные вкусивый;
Радуйся, всего себе Богу принесый.

Радуйся, преподобне отче наш Далмате,
Исетский чудотворче.

Кондак 4

Якоже исходит человек на делание свое до
вечера, яже от Бога, такожде и тебе уготованное
время приспе, отче; да оставив монастырь сей,
явлен будеши стране незнаемей доселе и не
ведущей пети: Аллилуия.

Икос 4

Егда же глубоцей молитве твоей, преподобне,
явлено бысть, да отречение сотвориши
игуменству своему, хотящему быти по прошении
братии, ускори тя Господь к призванию новому,
да зовем ти:

Радуйся, послушнике Господень неленостный;
радуйся, умом и помышлением простой.

Радуйся, всякое тщеславие презревай;
радуйся, смирение всему предпочтуй.

Радуйся, молитвою сердце свое освятивый;
радуйся, образ Божий тамо обретый.

Радуйся, к Богу, в нас сокровение
пребывающему, взирай; радуйся, повелений
Его не отступаяй никогда.

Радуйся, честолюбия николиже взыскавай;
радуйся, братии своей любви выну творя.

Радуйся, обители Невьянския духовное
угобzenie; радуйся, большая от Господа
вместити могий.

Радуйся, преподобне отче наш Далмате,
Исетский чудотворче.

Кондак 5

Не желая никакo приобидети братию от
разлучения своего, прения и разномыслия
никакоже допущая, решил еси тай, Божию
промыслу препоручившись, изыти к новому
месту подвигов твоих, во глубине сердечней поя:
Аллилуия.

Икос 5

Новыя неизреченныя ревности исполнися,
блаженне, да утолится жажда твоего о

уединении и безмолвии, юже предпочел еси
всякому назиданию, да поем ти:

Радуйся, Господа Путем Живым евангельски
уяснивый; радуйся, Ему во странствиях своих
последовавый.

Радуйся, вся и всяческая оставивый;
радуйся, блаженство нищих духом обретый.

Радуйся, молитвенниче преусерднейший;
радуйся, волю Божию соблюдый.

Радуйся, странниче любопрительный;
радуйся, отшельниче благий.

Радуйся, иноче, от Бога предназначенный;
радуйся, звание сие до кончины пронесый.

Радуйся, первопроходче мест дивиих и лихих;
радуйся, мужества апостольскаго
преисполненный.

Радуйся, преподобне отче наш Далмате,
Исетский чудотворче.

Кондак 6

Кия труды приял еси, отче, егда по некоему
совету удалился еси на восход солнца,
водворяясь в пустыню страны агарянския; да в
безмолвии сей сени смертней услышат ангели и
чловецы богокрасную песнь: Аллилуия.

Икос 6

Якоже воды Исети, скоро течаща нози твои, преподобне, по брегам ея; и идеже ты моляшеся, провидя селения христианския, тамо по времени храмы Божии воздвиглися бяху, да поем ти:

Радуйся, землю Исетскую молитвою своею облагоухавый; радуйся, к Богу ея приведый.

Радуйся, преданий церковных чудесный исполнитель; радуйся, отцев продолжателю крепких и благий.

Радуйся, стране неведомой чудное посещение; радуйся, освятителю мест темных и пустых.

Радуйся, на Господа надежду свою возложивый; радуйся, на посох веры опершийся, грядый.

Радуйся, все подвиги христианския исполнивый; радуйся, в молитве преуспевание имый.

Радуйся, Белаго Городища достигнувый; радуйся, иконою Успения место сие освяти.

Радуйся, преподобне отче наш Далмате, Исетский чудотворче.

Кондак 7

Яко некеого Сиона достигоста стопы твоя Белаго
Городища, преподобне отче, места весьма
краснаго души твоей. Прибежища скитанию
твоему, водворившемся в земли сей
обетованней, да присно слышим о тебе:
Аллилуия.

Икос 7

Древним пустынником подобяся, наипаче
блаженному Антонию Печерскому, Руси Святей
первому начальнику и обители благознаменитыя
основателю, ископал еси пещеру, преподобне
отче Далмате, и в ней вселился еси, предаваясь
подвигом неизглаголаннным, да поем ти:

Радуйся, древних отцев ревнителю
преизящный; радуйся, их подвигов наследниче
живый.

Радуйся, купче, бисер нашедый
многоценный; радуйся, оный до времени сокры.

Радуйся, тяготу и вар дневный претерпевый;
радуйся, молитвою к Царице Небесной
многоутешанный.

Радуйся, мироварнице трудов бденных;
радуйся, купель сияющая помыслов благих.

Радуйся, пустынножителю неизреченный;
радуйся, подвижниче непостижимо.

Радуйся, звание иноческое оправдавший;
радуйся, стяжание духовное умноживый.

Радуйся, преподобне отче наш Далмате,
Исетский чудотворче.

Кондак 8

Не для покоя вселился еси, преподобне, в места
пустынные и безводные, но пустыня потом и
трудом молитв твоих благоукаси, да
безмолвия глубоководного наслаждаясь и дух
твой с Господом сочетавая, изнесет всякое
дыхание твое: Аллилуия.

Икос 8

Аще плоть твоя увяде от поста и воздержания и
пакостник плоти твоея, сей древний змий,
молитв и трудов твоих устрашился, но призва сей
завистник спасения нашего клеветников, яже
Елигея подвижают погубити тя, отче
победительне, да поем ти:

Радуйся, земли Исетския озарение; радуйся,
оныя нечаянное прозябение.

Радуйся, землю сию облобызав, возлюбивый;
радуйся, яко крин райский zde обитель твоя
процвете.

Радуйся, Матери Божией небесное взирание;
радуйся, благотерпеливое Ея умоление.

Радуйся, любви Божией приверженный;
радуйся, неотлучно пребывая в ней.

Радуйся, зеркало подвигов многочудесное;
радуйся, мерило лучшего пути.

Радуйся, лампадо, в пещере пустынной
возженная; радуйся, свеще, сердца наша выну
согревающая.

Радуйся, преподобне отче наш Далмате,
Исетский чудотворче.

Кондак 9

Николиже почитание твое Царицы Небесныя
оставляя еси, выну заступление свое от враг,
видимых и невидимых, на Ню возлагаше, и
икону Успения Ея, яко некую Одигитрию пред
собой носящи, в ней же Сын Ея вознесшийся,
нисходя прияти Матерь Свою, слышит от всех
конец земли: Аллилуия.

Икос 9

О, неизбывное чудо, Владычицу к себе в Заступницу избра, да взбранным воеводством Ея устрашит неистоваго Елигея, якоже некогда хана Ахмета при Угре-реце, и понуди прежняго врага припасти со страхом Божиим ко стопам твоим, преподобне отче, да поем ти:

Радуйся, Сергию преподобному чудом равняяйся; радуйся, прилога дьявольскаго до конца отметаяйся.

Радуйся, даже до смерти подвизавыйся; радуйся, яко Бог тя сохрани.

Радуйся, Царицы Небесныя чудное заступление; радуйся, Небо к себе привлекий.

Радуйся, евангельское послушание исполнивый; радуйся, не токмо ланиту, но и выю врагу повергий.

Радуйся, наше несказанное радование; радуйся, изумление святых.

Радуйся, яко слезы твоя суть небесное ликование; радуйся, яко молитва твоя источает Божественный свет.

Радуйся, преподобне отче наш Далмате, Исетский чудотворче.

Кондак 10

Якоже не может светильник под спудом светити, но светит всем, иже в храмине суть, привлече благодать Божия к тебе, авво и похвало Исетская, многия ищущия спасения, да с ликом святых воспоют: Аллилуия.

Икос 10

Яви тебе, отче наш незабвенне, Господь новаго чудотворца стране нашей Сибирстей, да сложит с себе при ногу твоею Елигей в знамение примирения шелом и кольчужницу, от нихже до последних времен исцеление людие Божии получае, да воспоют ти:

Радуйся, ходатаю и заступниче наш пред Господем; радуйся, умолителю Его.

Радуйся, источниче неистощимыя радости; радуйся, благодатию твоею покрываяй вся концы.

Радуйся, отче богомудрый и вселюбимый; радуйся, иноков наздателью честный.

Радуйся, стадо свое премудре собравый; радуйся, многия и многия спасый.

Радуйся, аки кокош птенцы своя согреваяй; радуйся, повсюду благочестия лампы возжегий.

Радуйся, вся повеленная тебе от Господа сотворивый; радуйся, паче солнца всех освещающий.

Радуйся, преподобне отче наш Далмате, Исетский чудотворче.

Кондак 11

Ревностью благодарения к Царице Небесной распаляем, устроил еси обитель Успения Ея, и якоже новаго Афония вразуми Елигея и привлече его к милосердию, да молитвами иноков просветится страна, прежде ненасеянная, и яко кедр иже в Ливане возвысится к высоте духовней и достизает Небес безпечальная песнь: Аллилуия.

Икос 11

Не презри, отче убожества нашего, поелику не возмогаем достойное благохваление тебе принести, како нечестивыя паки брань на тя воздвигли суть, како чудесне спасся еси от пожарища, егоже чрез поганных змий изрыгнуше, желая поглотити обитель твою, колико страдания и печали понесл еси, напоследок труды непостижные, да возсияет обитель твоя, яко некий новый Иерусалим, да поем ти:

Радуйся, старче достоблаженный; радуйся, угодниче Христов преусерднейший.

Радуйся, игумене, Богом данный обители сей; радуйся, стадо свое смирением пасый.

Радуйся, строителю богомудрый и многочудесный; радуйся, иноче простой.

Радуйся, лестницы духовныя суровое похождение; радуйся, Креста Господня носителю святой.

Радуйся, монашескаго жития земли нашея светозарное начало; радуйся, Царствия Небеснаго светильниче драгий.

Радуйся, отче доброзачне и досточудне; радуйся, царя земнаго о нуждах обители зовый.

Радуйся, преподобне отче наш Далмате, Исетский чудотворче.

Кондак 12

Всяческая устрояй, якоже прежде реченный Антоний, вместо себя сына своего блаженнаго Исаака над братией постави, якоже Феодосия оный, вновь удалися к созерцанию молитвенному, да не изгладится Небесная твердь богописанною скрижалию: Аллилуия.

Икос 12

Чудеса твоя и исцеления даже доселе
изливаются, отче наш Далмате, но яко фимиам
истончеваясь в старчестве твоём, отшел еси ко
Христу своему в селения райская; тамо же лице
к лицу молиши Господа Сил о нас, недостойных
чадах твоих, да вси, видящи славу твою,
неустанно восхваляем тя:

Радуйся, красото всея земли Сибирския;
радуйся, небесный человеке и ангеле земный.

Радуйся, знамения и чудеса показавый нам;
радуйся, из глубины падения нашего скоро
возведый.

Радуйся, Царствия Небеснаго достойное
пребывание; радуйся, скоро в молитвах
послушающий нас.

Радуйся, отступником грозное обличение;
радуйся, от бездны греховныя нас извлачаяй.

Радуйся, цельбоносное очищение от всякия
скверны; радуйся, знамение во благо в
последняя времена.

Радуйся, старче, тайною Божией доселе
прикровенный; радуйся, великий угодниче
Христов.

Радуйся, преподобне отче наш Далмате, Исетский чудотворче.

Кондак 13

О, предивный угодниче и старче наш, преподобне Далмате! Призри на люди твоя, с верою и любовью к тебе притекающия и помощи ныне от тебе чающия; изми нас от рабства греховнаго предстательством многочисленным твоим и избави вечныя смерти, да с тобою воспоим Богу: Аллилуия.

Этот кондак читается трижды, затем читается икос 1 и кондак 1.

Молитва

О, священная главо, преподобне отче, преблаженне авво Далмате! Не забуди убогих твоих до конца, но поминай нас всегда во святых твоих и благоприятных молитвах к Богу. Помяни стадо твое, еже сам упасл еси, и не забуди посещати чад твоих. Моли за ны, отче священный, за дети твоя духовныя, яко имеяй дерзновение к Небесному Царю: не премолчи за ны ко Господу, и не презри нас, верою и любовью чтущих тя. Поминай нас недостойных у Престола Вседержителя, и не престай моляся о нас ко Христу Богу: ибо дана тебе бысть

благодать за ны молитися. Не мним бо ты суща мертвa: аще бо телом и преставился еси от нас, но и по смерти жив сый пребываеши. Не отступай от нас духом, сохраняя нас от стрел вражиих и всякия прелести бесовския и козней диавольских, пастырю наш добрый. Аще бо и мощей твоих рака (икона твоя святая) пред очима нашими видима есть всегда, но святая твоя душа со ангельскими воинствы, со бесплотными лики, с Небесными Силами, у Престола Вседержителя предстоящи, достойно веселится. Ведуще убо ты воистинну и по смерти жива суща, тебе припадаем и тебе молимся: молися о нас Всесильному Богу, о пользе душ наших, и испроси нам время на покаяние, да невозбранно прейдем от земли на Небо, от мытарств же горьких, бесов воздушных князей и от вечныя муки да избавимся, и Небеснаго Царствия наследницы да будем со всеми праведными, от века угодившими Господу нашему Иисусу Христу, Ему же подобает всякая слава, честь и поклонение, со Безначальным Его Отцем, и с Пресвятым и Благим и Животворящим Его Духом, ныне и присно и во веки веков. Аминь.